

ضاع الطريق منا

شعر

عبد الحميد فرج

(شاعر الغربية)

تقديم
دكتور يسرى العزب

مطبوعات الفجر
تصدر عن جماعة الفجر الأدبية بالقاهرة

المشرف على التحرير

دكتور يسرى العزب

المراسلات

الجيزة - أرض اللواء - فيصل

١١ ش محمد منصور

تليفاكس : ٥٧٠٢٢٤٢

المحتوى

٥٥	٢٥ - لو اتبدلت أفكارى	٤	* مقدمة
٥٧	٢٦ - باخاصمك .. يا دنيا	٥	* تقديم د. يسرى العزب
٥٩	٢٧ - لو مالت في يوم الدنيا عليك	٧	١ - أشعارى
٦١	٢٨ - معادلة صعبة	٩	٢ - يا حمو " إهداء إلى ابني "
٦٣	٢٩ - القرش الحرام	١١	٣ - أه يا كلمة
٦٥	٣٠ - أشكال .. واللوان	١٣	٤ - قدر الشاعر
٦٧	٣١ - وحيد وسط الضجيج	١٥	٥ - ضاع الطريق مننا
٦٩	٣٢ - الصبر جميل	١٧	٦ - راجع .. يا بلادى
٧١	٣٣ - اللي يعيش .. ياما يشوف	١٩	٧ - عنوانى
٧٣	٣٤ - ماتخافش .. أنا جنبك	٢١	٨ - الطرب الأصيل
٧٥	٣٥ - كفاية .. نوم	٢٣	٩ - إلى نجاة الصغيرة
٧٧	٣٦ - ابني الحبيب	٢٥	١٠ - أنا حبيبك
٧٩	٣٧ - باشتاق لك يا أمي	٢٧	١١ - عشان افتكرك
٨١	٣٨ - من الشاعر لمغربي مصطفى العلشق إلى شاعر لغربة	٢٩	١٢ - ما تعملوهاش حكاية
		٣١	١٣ - ذكرى ميلادى
		٣٣	١٤ - مافيش حكاية
		٣٥	١٥ - ليلة المصير
		٣٧	١٦ - واحشنى طيفك
		٣٩	١٧ - أجمل هدية
		٤١	١٨ - بدون تعليق
		٤٣	١٩ - من غير عجب
		٤٥	٢٠ - حلمي داريته ف سرى
		٤٧	٢١ - وتتغير حاجات
		٤٩	٢٢ - عايش وحيد .. طب ليه ..
		٥١	٢٣ - عمرى .. بقى خمسين
		٥٣	٢٤ - في زحمة الدنيا



إذاعة الوطن

صوت الجالية العربية ببروكسيل

Bruxelles, le

بسم الله الرحمن الرحيم

نشاعر عبد الحميد مصطفى أرحم و عرفناه زمينا لأدعيا غافل سنوات طويلة في الاذاعة العربية ببروكسيل.
عن طريق برنامجنا للجمهور من قصص الانبياء " الذي نلقى اعجابا و اهتماما كبيرا من الجالية العربية والمستمعين في
بجربا. و دائما نقيمته كشاعر بالقصيدة والحكمة المصرية.
فيسعدني أن أكون زميل في عبد الحميد نشاعر القوية على طبع و بسند أول ديوان له بالحمية المصرية
بأول "شعاع شروق" والذي يتناول فيه كثيرا من مشكلات و معاناة المصريين في أوروبا.
كما يهوى هذا الديوان على بركة من الأعمال الشعرية و الاجتماعية والفنية.

مع تمنياتي له بالنجاح التام والمستمر في مجال القلم و فخر خدمة الثقافة العربية.

مع تحياتي

أحمد حسن قنبره

اعلاني و شكرتكم إذاعة الوطن ببروكسيل
هرم ببروكسيل يوم 21 ماي 2004

تقديم

بقلم دكتور يسرى العزب

(ضاع الطريق منّا) ديوان جديد، لشاعر جديد.. يمثل
بالعواطف الإنسانية حتى يجيش — حين تفيض في ذاته —
فيتفجر في قصائده حباً للوطن وللإنسان .

صاحب الديوان يسمي نفسه (شاعر الغربة) بالرغم من كل
هذا الحب الذي يملؤ قلبه .. وبالرغم من حنينه الدائم — وهو
الذي يقيم في واحدة من أجمل بلاد الدنيا في أوربا هي بلجيكا
منذ ثلاثين عاما — لمصر / الوطن / الأهل / الأرض / الأم /
العشرة / الصداقة .. والانتماء .. وهو مجرد مسافر بالجسد
لكنه — بالروح — يبقى مواطناً مصرياً سكندرياً يعيش كل ما
يعيشه أبناء الإسكندرية من مكابدات وانتصارات .. حتى لا
نرى غير الوطن مجسداً في الديوان .

والشاعر المصري عبد الحميد فرج شاعر جديد لأنه يكتب
قصائده بطريقة جديدة يختار موسيقاها من إيقاعات صوتية
مغايرة لما درج عليه شعراء العامية المصرية .. حيث نراه

يعتمد في الأساس على مخزون صوتي حمله معه في روحه منذ الصغر .. لعبد الحليم ونجاة الصغيرة وشادية وأم كلثوم وعبد الوهاب وفريد وكل الأصوات المصرية البديعة في ذلك الزمن الجميل في ستينيات القرن العشرين زمن (الطرب الأصل) كما يسميه في عنوان لإحدى قصائده .. ومن هنا فإن معظم هذه القصائد داخل الديوان يمكن أن تكون أغنيات .. لو نجح عبد الحميد فرج (شاعر الغربة) ونجحنا معه في استعادة هذا الزمن الجميل الذي يعودته يعود لنا (الطرب الأصل) .
يبقى .. أن أهنئ شاعرنا المصري الأصل عبد الحميد فرج الذي يؤكد في ديوانه الأول روعة الانتماء للوطن وبهاء الحنين إليه وعظمة التمسك بأصوله القوية والنبيلة .. أهؤلاء بصدور ديوانه الأول الذي يعيده - رغم غربته - فلذة حميمة لم تفقد مكانها - في قلب أمنا الغالية (مصر) .

د. يسرى العزب

القاهرة في ٢٠/٥/٢٠٠٤

أشعاري

أشعاري همّ ولادي ..
ولدتهم من قلبي
وكل كلمة كتبتها ..
سرّها ومعناها عندي
في مرة الولادة تتعصر ..
وماغيش طبيب
وف مرة نتجي وحدها ..
باللهام الحبيب
ومرة من قلبي تخرج ..
بنزيف شديد
وتخرج قوينة ..
أقوى من حديد
أحس بسعادة ، وبعد الولادة
سعادتي تزيد

وتجى أميرة

أسميها قصيدة ..

تسكن ديواني ..

واديها عنواني

وأشعرانى ..

بقربت

عبد الحميد

إهداء إلى ابني "محمد"

يا حمو

يا حمو أمك بتحبك تستاهل حبها
عشان آخر العنقود وحتة منها
وعشان حلو وقطقوط وآخر صبرها
يا حبيبي .. يا حمو .. تستاهل حبها
وانا برضه كمان باحبك واخواتك كلها
دول سبحة لولى بيضا ومنور وسطها
راجل على صغر سنك ورجولتك وحدها
ياما كنت حلم لامك واتحقق حلمها
يا حبيبي .. يا حمو .. تستاهل حبها
بادعي لكو ليلاتي ربي يحفظكوا كلكوا
ولا عمره ف يوم تفرقوا ويجمع شملكوا

وتحبوا بعض دائماً ..
وتودوا بعض دائماً ..
تفضلوا على طول السبحة ..
ومنور قلبها
يا حبيبي .. يا حمو .. تستاهل حبها

آه يا كلمة

في مرة تكوني حكمة ..
ومرة تكوني نقمة ..
.. ومرة من فم صاحبك ..
في قلب هدفك حربة ..
يا تقتلي .. يا تجرحي ..
وجرحك .. عمره ما يبرا
يا تسعدي .. وتفرحي ..
ناس منشوقة وصابرة
يا كلمة النميمة يا بنت ... الكلام
تحبلي في الظلام ..
تولدي والناس نيام ..
الف كلمة في الدقيقة
تخرجي من فم جاهل ..

ترحلي جوه المجاهل ..
صحيح خروجك ساهل ..
لكن بحوره غريقة
وعمرك يا كلمة ... ما بترجعي سالمة
ياما بيكي كانت وعود ..
وياما اتصاننت عهود ..
والرجال اللي بحقيق ..
كلامهم دايماً عقود ..
وآه يا كلمة مفبركة ..
تبقي في الضحك كلام وكمان في البكا
وفي السكوت كلام من لوعته ما اشتكى
خلي كلمتك سلام
وقمر ينور ظلام ..
وتكون دليل الأمان في النور أو في الضلمة
وآه يا كلمة ..

قدر الشاعر

قدر الشاعر .. بفضل طائر .. ما يرسى بأرض
يحب السما شمس و غمام
يعشق وليفه .. زى الحمام
وتمللى طيره عكس الريح .. عرضي في عرضي
في صدره شابل قناطير هموم
عمر اجفانه ما تعرف نوم
وإن لحظة غفلت .. ييجى ملعون .. وحى الجنون
يحرمه م النوم .. ويقوم مهموم
يكتب .. ويكتب بخيال ملايكي
وبين صوابه .. مجداف فلايكي
يشق بيه كل البحور
يدخل بيه البحر المسحور
يكتب كلام .. عن الشعوب .. عن الآلام

عن الحروب.. عن السلام
بتستهويه ساعة الغروب.. وتوحي له بحاجات ..
بأن في الآخر ممات
ويحب برضه الشروق والنور ..
ويكتب كلام بلور .. وكلام ما بين السطور
لو فهموه .. يقولو مسحور
وعايش بين ناسه .. فقيه منبوذ ..
ويبقى شباب .. وكأنه عجوز
ويفضل مهموم وحائر .. ودائماً على قدره صابر
وقدره إنه يفضل طاير

ضاع الطريق منا

فين الطريق .. يا ناس .. ؟
سبنا الطريق خلفنا
سبنا بلادنا ..
.. سبنا حينا
يمكن نقابل ناس .. زينا
ناس طيبين .. أو مخلصين .. جايز تعوض صبرنا ..
أتارى أحلامنا .. سراب ..
وعشنا فى غربة عذاب ..
غربة أمر من غربة أرضنا ..
غربة قلوبنا فى وسط أهلنا ..
وغربة طريقنا اللى ضاع منا ..
ضاع الطريق منا
النية كانت فى البداية سنة

ونرجع بلادنا ...
... نعيش حياتنا
فانت السنين .. سنة .. ورا سنة
غالطتنا أفكارنا .. نمينا نفسنا
دبلت زهور عمرنا ...
خسرنا ياما .. خسرنا شبابنا
خسارتنا اللي أكبر ... كانوا ولادنا ...
... وفقنا فى بلادنا أهلنا
وبقينا ف مفترق تايهين ... فين الطريق يا ناس ..؟
حاولنا نبداً من جديد ... حاولنا نللم جرحنا ..
حلمنا بليلة عيد .. عاندتنا إيماننا ..
ما رضيت تفرحنا ..
ولقينا روحنا لوحنا ..
الدمع سال على خدنا ..
يا مين .. يداوى جرحنا ..؟
يا مين .. تعوض صبرنا ..؟
ضاع الطريق .. مننا

راجع يا بلادی

من يوم ما فارقتك يا بلادی
العيشة مرار .. وما حلى زادی
الغربة عملت عمايلها
مع إني باحاول أحيائها
أكذب على نفسي واتجمل
وأدوق المر وأتحمل
على أمل إني أرجع في معادی
لناسي .. وأحبابي .. وبلادی
وتمر ايامی اليوم بسنة
أشوف المراية .. القاني مش أنا ..
الشعر الابيض ملا راسي
من غربة عذاب وزمن قاسي
أتعب، واتعذب، واتألم
ولا قادر أشكي .. ولا اتكلم

خايف أيامى .. لا تسرقنى
واموت ما القاش من يلحقنى
ما كفاية على من الغربة
حارج للضحكة وللصحبة
لقلوب تحضننى جواها
لنهايتى اللى باتمناها
والقانى باصرخ وبانادى
أنا راجع تانى .. يا بلادى

عنوانی

عنوانی هو مکانی ..
ومکانی .. مالوش عنوان
زمانی .. کان زمانی ..
والزمان .. سجن الإنسان
کان یا ما کان .. کان زمان ..
.. وکان إنسان
غدر بیه الزمان ..
من ناس کانوا .. وهو کان ..
من ناس خانوا .. سرقوا الأمان ..
إِتمنوا له الضیاع ..
سافر من غیر وداع ..
سافر من ماضیه ..
عینی ویا عینی علیه ..

مسافر .. مهاجر
ولسه .. مسافر
فی دنیا غیر دنیته
تاہت خطاوی سکتہ
سافر خارج زمانہ ..
سافر معاہ عنوانہ ..
ربہ الی عالم بیہ .. یمن فی یوم یہدیہ
ویلقی المکان .. قلب انسان ...
ویبقی لہ عنوان

الطرب الأصيل

الطرب الأصيل بقى إبرة وضايعة فى أكوام قش
تشوفها.. نقول لقيتها.. تغطس ويعلا القش
موسيقى ورش حدادة وسموها فن جديد .. كل ساعة بوش
يوماتى فيديو كليب ممكن واحد يصيب ..
والباقي كله غريب

عروض أزياء.. ورقص خليع
باسم الفن .. ده فن وضع
دوبوا توب الفن .. من كتر الترفيع
الطرب الجميل بقى نكرى

يا ريت نلقى له فكرة تحفظه م الغش
اللى جعان فلوس .. حيغنى وحيلقى اللى يسمع له
حتى نهيق الحمير مستنى اللى يشجعه بجهله
وإن كنتى بنوتة حلوة حتلاقى فرصة وألف
وكثير اللى حيصفق وكثير يحبوا الصنف

وإن كان لك قريب أو فراقير العجيب
أكيد حيكون لك مساهمة فى عالم التخريب
وحتلقى لك حمـاية مع الدبابير فى العش
الطرب الأصيل بقى إبرة
وضايعة فى أكوام قش

.. نجاة الصغيرة

يا أذى صوت سمعته بباخذنى للحنين
زى الطير المسافر لسكة العشاقين
لما بتغنى .. كروان ونسمع الألحان ..
بنسافر مع الطير لأيام زمان ..
وعصفورة من الشباك وفى بلكونة الجيران ..
بتشاور من هناك
أحلى ذكريات .. بنفتكرها كل فين وفيين
يا صوت ملايكي يا زهرة الياسمين
عيون القلب ما بتتامشى من شدة الحنين
بتتحايل على رمشى ..
وتترجاه ما يقفلشى ..
ع القلوب اللي ما نامت ع العيوب السهرانيين
اللى بتعيش وتسמע وتطير فى السما

ولما تتعب بترجع وتعيش فرح وهنا
وقلوبهم ملهوفين للقا .. للحنين
حتى ولو كان اللقاء كل فين وفيين
لسه عندي كلام عايز أكمله
وحبل الكلام انقطع مش عارف اوصله
مش عجز ف شعري ولا نقص ف حيرى
ولا قلمي عصاني ولا شيء معطله
إلا زحام أفكاري بكلام باتصوره
يناسب المقامات ويضبط الأوزان
فى بحور غريقة من الشعر .. مليانة ألحان
حتى لو خضنتها مش حاقدر
ستأثر بحر منه مش حتعبر
ولا توفى لعطائك طول السنين
يا أدفى صوت سمعته .. بياخذنى للحنين

أنا حبيبتك

منى الليلة دى أنا حبيبتك

ساعة ما شفتك ولقيتك ..

قاعدة قصاى .. نفس الليلة دى

شفت الجمال اللي بهرنى جمال عينيكي اللي سحرني

قلبي قال لي.. وكان دليلي وعيني فشت.. باحت بسرى

أكيد فهمتي .. وانتى تشوفى لي ..

نظرات عيني كلامي ليكي

قلبي اللي دق شاور عليكي

سابني وراح لك ومال إليكي

سنيني اللي فانتت بادور عليكي

إستيتيك .. ولقيتك .. ومن الليلة دى أنا حبيبتك

* * *

من شوقي ليكي.. بعد الغياب.. نسيت كلامي حتى العتاب

كان نفسى أقول لك .. حاجات كتيرة ..
وكننت خايف .. لا يكون سراب
كان نفسى اضمك .. كننت حاقول لك
إنى باحبك .. إنى هويتك .. ومن الليلة دى أنا حبيتك

* * *

برغم حبى .. أنا كننت خايف .. من لغز قلبك .. ويا ريتنى عارف ..
مخبى إيه ؟ .. وان كان هوانى .. ما قالش ليه ؟ ..!
قتلتنى حيرتى .. من اللى قلتى ..
ما قدرتش انى أكمل حكايتى ..
الوقت يجرى .. والليل بيسرى .. وما فهمت حاجة
قاعد قصادك .. وكأنى شافك من فوق سحابة
خلص الكلام .. قلتى السلام ..
وفضل سؤالى .. من غير إجابة

عشان افترك

أنا بانسى نفسى .. عشان افترك
وبافضلك .. دايماً على روحى
صبرت نفسى .. كتير على غدرك
وغرقت وحدى ف همى ونوحى
وانتى اللى عمرى .. ما جيت على فكرك
ولا مرة تداوى لى جروحي
يكفينى هجرك ..
يكفينى غدرك ..

ده انا بانسى نفسى .. عشان افترك

* * *

عملت ياما .. عشان أراضيك
وقابلت معروفى بصدك
حاولت يمكن .. أغير فيك
وفضلت دايماً على طبعك

يكفينى هجرك ..

يكفينى غدرك ..

ده انا بانسى نفسى .. عشان افكرك

* * *

إبيتك أحدى سنين عمرى

وما نابنى غير أشواك وردك

رضيت بقسمتى وبقدري

وانت اللى خنت معاى عهدك

يكفينى هجرك ..

يكفينى غدرك ..

ده انا بانسى نفسى .. عشان افكرك

ما تعملوهاش حكاية

ما تصدقوش الناس وما تعملوهاش حكاية
دى مراية الحب صافية والقلب اصدق مراية
إن كان أهدافه سامية وبعيد عن كل غاية
حتكون العشرة دقية ويعيش حتى النهاية
أنواق بتختلف ..
وأرواح بتتلف ..
على إيه ندور ونلف ..
في الحب مافيش غواية
يبقي ف عيوني ملاك في عيونه غير كده
والعكس عنده جليز وعندى انا مش كده
من نظرة واحدة يكفي وبتبدأ الرواية
سبحانه هو الموفق لكل اتنين حبايب
ما جمع الا وفق دنيا فيها العجايب

وعلى أُنقه السبايب
وخلاهم حبايب

يتقابلوا بدون ميعاد
الله هو الموفق
فرقاً بالصبايا ..
دي قلوبهم في البداية ..
وما تصدقوش الناس
ماتعملوهاش حكاية

ذكري ميلادي

النهاردہ .. ذكري ميلادي ..
أجلته لحين رجوعك
من يومين .. زى الليلة دي ..
كنت جنبى .. وكنت باسمع نبض قلبك ..
لما كانت راسى نائمة فوق ضلوعك
ليه سافرت .. ؟ وليله بعدت .. ؟
إزاي قدرت تسيبنى وحدى .. ؟
ليه قسيت .. ؟ وليله مشيت .. ؟
وقللك ليه طواعك على بعدى .. ؟
في ليلة السفر .. كنت حابر
وجه الصباح وودعتك .. إنت فاكر .. ؟
كان ضباب .. وشتا ورياح .. برضه فاكر .. ؟
وفي المطار .. نزلت سلم .. واختفيت
أكيد بعد ما بعدت عني .. بكيت

ما انا زيك كنت بابكي .. لأنني حبيتك بقلبي
ورجعت بيتي أثور عليك .. أشم ريحتك
سألت الحيطان .. حتى الببيان .. كانوا حزانني على بعدك
لكن غيابك طال في السفر .. وأنا بانتظر
وما فيش خبر .. أسأل يقولوا تليفونك انكسر
ما هو كان باين ليلة السفر
وف يوم رجوعك .. من اشتياقي وأنا باستناك
كنت ناوية اضمك في حضني .. ساعة لقاك
لكنك كنت شخص ثاني .. وعنى غريب
مش حبيبي الأولاني .. لأ مش حبيب
قلبي اترعش .. حسيت بخوف وكأنه برد
نفس رعشة ليلة السفر .. كان برضه برد
حتى إيدك في السلام كان فيها برد
وافترقنا في المطار ..
أنا مش آسفة على الفراق أو الانتظار
لكن المزار إن البعاد ... في ذكرى الميلاد

مافيش حكاية

فجأة اخترت النهاية تبقي فين الحكاية ؟!..
جائز ملّيت حياتي وانت عايش معاى
ولما العشرة استحالت ..
لما أيامها طالت ..

اخترت انت النهاية من غير كلام وياى
تبقي في الحكاية ؟!..
ومافيش أصلا حكاية

* * *

كنت دايما معاند عمرنا ما بقينا واحد
ساعة ما اكون يمين كنت أنت تروح شمال
ورغم كل السنين العشرة بقت محال
خلّيت حياتي معاك أربع فصول م البرد
كانت في مرة ريح وكانت في مرة شرد
وباقى الليالي رعد ..

ولخترت انت النهاية تبقي فين الحكاية ..؟!

* * *

كنا في عش واحد وكأنك مش معاي

أنا اللي كنت أسأل وأنا اللي كنت حاير

وانت عصفور وطاير

ولخترت انت النهاية ... وإيه بعد النهاية ؟

بتقول حتعيش سعيد وحتبدأ من جديد

روح عيش لكن بعيد بعيد ومش معاي

وكفاية ان حياتنا مافيهاش ولا ذكرى حلوة

من أول البداية ..

يعنى مافيهاش حكاية ..

وانت اخترت النهاية ومافيش أصلاً حكاية

ليلة المصير

في ليلة .. كان مكتمل فيها القمر
كنتى فيها أجمل م القمر
حتى الطيور كانت بتغني فوق الشجر
من ليلتها عشقت السهر
الناس تستتي طلوع النهار
وأنا باتمني ليلي يطول
سألتك وقلبي ملهوف انتظار
لجواب ممكن يكون معقول
جاوبتي وباختصار ..
كلام مش منتظر
قلتي لي اصبر
وسيب المصير للقدر

اوعى نقرر وانت مجروح
والزمان كفيل يداوى الجروح
قلت لك ماتتسيش إني بشر
ساعتها قلتي نمشي نروح
لكن .. اسمعيني .. باحبك
وعمره ما كان بيدى ولا بيدك
لى رجاء عندك
باحلفك بنبض قلبك
مهما حصل مني ومنك
خليني دائماً عاشق ..
وأفضل عمرى احبك

واحشنى طيفك

واحشنى طيفك يا غالى بقي لى مدة ماشفتك

سهرت اعد الليالي وعمرى ما فارقتي صورتك

ماكنتش اعرف أن البعاد ..

حيزيد عذابي ف غربتك

ما نابني منه غير سهاد

وشوقي ليك زاد .. وزاد

زود غلاوتك ومحبتك

وتعيني سهر الليالي

واحشنى طيفك .. يا غالى

* * *

كان البعاد .. بعد الخصام

وخصامنا كان .. من غير كلام

يمكن نكون اتحسننا ؟..

ممکن تګون مافهمنتیش ..؟!

والا هی عین صابنتا ..؟

وانت قسیت مارحمتتیش

ما کفایة اللى شفته ف بعدادك

خلانى أسهر ليلالي

واحسنى طيفك .. يا غالي

* * *

أرجوك سامحنى يا غالى ..

وارجع لى شوف اللى جرى لى ..

ده أنا ما استحقش الهجر ده !

أنا اللى سقيتك حنانى ..

ووهبتك عمرى وزمانى ..

ما ينوبني غير الظلم ده ..!

ارحمنى من ظلم الليالي

واحسنى طيفك .. يا غالى

أجمل هدية

كنتى فين متدارية .. ؟
يا وردة بلدى ندية ..
يا فل الزهور .. يا زهرة عطور
يا بنت بلدى .. يا عربية
واحتار في وصفك ..
حورية م السما..
بعتك ربنا لى
بعث لي أجمل هدية
باشوف الحزن ف عينيكي .. متدارى في بسمه
والا خفة الروح .. أرق من نسمة
نسمة ربيع .. هادية ، مبتسمة
واشوف شعرك ..
مفروود على ظهرك .. بلون الحنة أصيل
يدق قلبي .. يرقص .. يميل

يقول لى أهى .. أجمل هدية
ساعات باشوفك قلب وبس ..
وساعات باشوفك عقل وحس ..
حتى ف فرحك .. فرح ف همس
وأجمل ما فيكى .. عزة نفس
ولما تكونى بعيدة عنى ..
دائماً بأحسك كل الحس
يا زهرة صبار ندية ..
يا أغلى وأجمل هدية

بدون تعليق

أُتمنى اعود سن العشرين
لكن بكل دراية الخمسين
واشوف جمال الكون حوالي
واعيش ربيع وردة ندية
ما تسألونيش عن الأسباب
معذور يا ناس .. وبلاش عتاب
كفاية عمرى عدى سراب
في عيال وهموم شيلتها بدرى
وارجع واقول ده كان قدرى
الله يجازيك يا للى ف بالى
والله يسامحكوا .. يا بنى آمين

من غير عجب !

اتخيل بطة .. في مشية قطة .. تشوف العجب !
تقع البطة .. في أول نطحة .. إليه السبب ؟
تلقى القطة رشيقه بتمشى بخفة ودلع
والست البطة بطيئة إن حاولت تجرى حتق
واهو ده السبب من غير عجب
وأدى غراب مالوش أحباب .. عامل كروان ..!
قال إيه حيغني .. وصوته .. اسمعى يا ودان!
سمع الكروان .. فأت له الحنة ..
هاجر لبعيد ، وساب الغربان .. ما هي كانت غلطة ..
إنه يعيش كروان وغراب .. في مكان واحد
زعلوا الغربان .. اتهموا الكروان ..
إنه غلطان .. وكمان جاحد
لكن الكروان .. في عيشته بعيد ..
عايش في أمان

لا غراب حيغنى .. ولا أى رذالة ..

من إنسان

غراب الأحزان ..

صحيح زعلان .. فهم السبب .

إن البطة تقلد قطة ..

ده يبقى العجب

حلمى داريته ف سرى

حلمى داريته ف سرى ..
قافل عليه الأبواب
خايف لا يعرفه عزولى ..
ما ينوبني غير العتاب
والحلم يكون خيالى ..
تهزأ منه الصحاب
داريت عليه جوائ
يعيش يموت ويأى
ده حلم ينفع رواية ..
بطلها شجن وعذاب
ماهو حلمى هو أنا
رفيقى من أول سنة
مصاحبنى مطرح ما امشى
هو غطاي .. وفرشي

منه .. صنعت عرشي
جائز يكون محال ..
جائز يكون خيال ..
كان أملى ف ربنا
هوّ اللى عيشنى ف هنا ..
وخلانى أمير نفسى
حلمي أنا اللى اختارته
على قد الظروف فصلته .. وفضلت عايش بيه
لحد ف يوم ما الاقيه ..
قرب من الحقيقة .. ويادوب فاضل له دقيقة
ساعتها أبقى احكيه ..
واقول للناس عليه .. واخرجه من سرى
وافتح له ألف باب

وتتغير حاجات

ما بين ثواني وبين دقائق
تتغير حاجات .. وحاجات
لحظة بتبقى فرحة ..
ولحظة غير معلومة ..
وحاجات ما بين لحظات
ناس عايشة أصل ..
وناس عايشة صورة ..
وناس ما بين متاهات
منهم من سبق غيره ..
وقطع كثير .. مسافات
وفيهم سجين فكرته ..
لحد ما القطر فات
يحاول إنه يلحقه ..
هيهات يلحقه .. هيهات

فيه ناس راضية بالنصيب
والدنيا مش شاغلاهم
وناس فارقتها الحبيب
عاشوا وماشافوا وراهم
وغيرهم .. عاشوا بالأمل ..
وصبروا صبر الجمل ..
على هم غير محتمل ..
في صحرا .. زادهم مش معاهم
والأمل ياما حقق حاجات
لكن القدر بيغير المسارات
وما بين ثواني .. ودقائق .. تتغير حاجات .. وحاجات

عائش وحيد

عائش وحيد .. طب ليه ؟!
بيبيكي على الماضي ؟
طب مين حبيبي عليه ؟
ويمكن مرتاح مع نفسه ؟!
ويمكن راضى بحبسه ؟!
لكنه لو قال آه ...
حترد الحيطان وياه ..
ومين غيرها اللي سامعاه ؟ ..
ده مافيش صحاب حواليه
ويعيش وحيد .. طب ليه ؟!
حتى الطيور في الفضا ..
بتعيش .. جماعات
وان طيرة جاها القضا
تحزن عليها الاخوات

وهو عايش لوحده .. لكن لحد فين ؟..
فصلّ حياته على قده .. بدل ما يبقوا اتنين ..
يتونسوا .. أو يرقصوا ..
يحكى لها .. وتحاكيه ..
اختار يعيش وحيد ..
ولسه ما اعرفش ليه ..!!؟

عمري .. بقي خمسين

بعد ما عمرى بقي خمسين
وخذتتي ذكريات الطفولة
لمدرستي .. لشجرة الياسمين
لما كنا صغيرين .. خيالنا مش مسئولة
واصحابي من سنة أولي .. وشنطة كتب من قماش معمولة
وياخذنى الحنين .. وتسيل دمعتي
تكوى ف جراح السنين
بعد ما عمرى بقي خمسين
باتمنى اعود تلميذ
وفى المدرسة ، يرن الجرس
واجرى ع الحوش مع عزيز
مسلم ومسيحي .. كلنا تلاميذ

وجريت بينا السنين
عشرين ورا عشرين
الدنيا اتغيرت .. واتبدلت المساكن
في المبني كثير ساكنين ..
وكان لهم عناوين ..
لكننا تايهين ..
نسينا العناوين
وعرفت معنى السنين
عمرى بقى خمسين

في زحمة الدنيا

مين يحس بمين .. ؟

مين بيعرف مين ..؟

في زحمة الدنيا

طب مين بيحب مين .. ؟

ومين في حب مين ..؟

عيشته كانت هانية

والناس في الدنيا تايهة ..

تايهين عن الدنيا

* * *

ناس من نفسها تاهت ..

قالوا حاجات كتير

وكتير حاجات ما انقالت ..

وكلام كتير وكتير

كلام كتيره قليل ..

عن مين ومين ومين ..

من اللي عايشين في الدنيا؟

* * *

ياما احتارت عقول .. في معرفة البشر

معقول وغير معقول .. في مفهوم البشر

ياما حاولوا يعرفوه .. وتهموه في القدر

عملوا اللي عملوه ..

وايديهم بقت جانية

مين يحس بمين .. ؟

ومين بيعرف مين ..

في زحمة الدنيا ؟

لو اتبدلت أفكارى

إيه اللى ممكن يحصل .. لو اتبدلت أفكارى .. ؟

من بعد كل اللى شفته .. من كل اللى جرى لى

من ناس مُدعين ..

بوجوه مثلونين ..

ما نابنى غير شرهم .. وياريت سابونى ف حالى

وبعد كل ده ..

لقيتتى عشت ف حيرة ..!

يا حاعيش بنفس أصالتى ..

يا تحلوا لى سؤالى ..

إيه اللى ممكن يحصل .. لو اتبدلت أفكارى .. ؟

* * *

اخترت اعيش أصيل .. علمنى أهلى السماح

عاشرت كثير وقليل .. أغلبهم مش ملاح

كلام الليل .. عسل .. وعلقم فى الصباح

قدمت كل خير .. ردوه آلام وجراح
جائز أكون غلطان .. واستاهل ما جرى لى
إيه اللى ممكن يحصل .. لو اتبدلت أفكارى ..؟

* * *

لو فكرت إنى اكون زيهم ..
يا حاعيش معاهم .. واغشهم ..
يا إما أبعد عنهم ..
ولا أعرفهم ولا اودهم
واترجاهم .. يسيبوني ف حالى
عشان ما اعيش مرتاح ..
لاجل ما يرتاح بالى
ويمكن بس ساعتها ..
ما ابدلش أفكارى

باخاصمك .. يا دنيا

باخاصمك يا دنيا .. واصالحك في ثانية

ومش قادر عليكي

لكن انت يا دنيا .. حياتك دى فانية ..

وأنا بين إيديكي

وهائم في أرضك .. وواقع في عرضك ..

وتعبت فيكي ..

وآه يا دنيا منك

.....

يا دنيا حلوة ومرة .. عايش وراضى بيكي

لا ف يوم صالحتيني .. وما عرفت انى اراضيكى

طب عايزة إيه يا دنيا ..!؟

مش راضية ليه يا دنيا ..!؟

ياريت اعرف إيه قصدك .. ويكون حله بإيدى

وآه منك يا دنيا

.....

إسمعيني يا دنيا ..
باقول لك يا دنيا ..
حتى لو تهزمني
يا ريت يا دنيا ..
إني أفهم طبيعتك ..
ياريت تجاوبيني
اتزوقي يا دنيا ..
واحلوي بطريقتك ..
عمرك ما تغيريني
وآديني يا دنيا ..
صابر ومستتي ..
لنهاية سنيني
ولسه يا دنيا .. صابر يا دنيا

لو مالت في يوم الدنيا عليك

لو مالت في يوم الدنيا عليك .. وتكون شجرتك .. راح طرحها
وانقض احبابك من حواليك .. وفاتوك في قسوة بردها
انقض خريفك من عليك .. واسقى زهورها .. ووردها
يطرح ربيعك .. يسر عينيك
لو مالت في يوم .. الدنيا عليك
* * *

العبرة يا صاحبي مش في وقوعك ..
قوم وانهض من جديد
وان زادوا ذلك وخضوعك
أو عاملوك زى العبيد ..
خلى دمك يفور في عروقك
يحرك شريان ووريد
ارفض إحسانهم .. موت بجوعك
أقلها .. حتموت سعيد

وتلاقى من يترحم عليك ..
لو مالت في يوم الدنيا عليك

* * *

الكرامة يا صاحبي .. مالها بديل
وان عشت بدونها .. بتعيش عليل
آخرتها ندامة .. وتموت ذليل
وساعتها .. ما يفيد الندم ..
ساعتها حيكون العدم ..
وجنيته بأيديك ..
وده اللي خلى الدنيا .. مالت عليك

معادلة صعبة

الدنيا .. معادلة صعبة ..

حلها مش في إيدك

تحاول إنك تعرفها ..

تلاقى نفسك ما عرفتش

تحاول انك تفهمها ..

في الآخر ماتفهمش

سيب همومك .. وارمى حمولك

على الله سيدك .. تحملها وحدك .. ما تقدرش

كان فيه واحد بيحب واحدة

وهي كانت بتحب غيره

وغيره كان بيحب غيرها

وطال عليه ... يا دنيا ليله

كل واحد مشغول بهمه ..
واللى مش مهموم ..
مشغول بغيره
تاعب في نفسك ليه .. ؟!
بايدك تعمل ليه .. ؟!
اترك همومك .. عيش ليومك
وانسى اللى فات
ده القلب .. لو زادت حموله
بتكون نهايته السكات .

القرش الحرام

القرش الحرام .. بيدور في الفاضى
وان كان يفيد ..
أو حتى يزيد .. حبيقتى ماضى
وحيرى لزال ..
وما يدوم له حال .. والله غير راضى
لو تكسب حرام .. تغضب ربك
لو ربك يزيد .. وقف عندك
بتخلط حرام .. ويا الحلال
يدخل حرام .. ياخذ الحلال .. والمليان يصبح فاضى
أيوه الحلال متعب ..
لكن له سعادة

ومهما كان قليل ..

بتزيد بركته زيادة

ويرضى الله عليك ..

وتتول ثواب العبادة

حتكون قرير العين .. والبال مرتاح وهادى

ده القرش الحرام .. بيدور في الفاضى

أشكال وألوان

بنشوف كثير .. أشكال وألوان ..
واحد وعمره فوق الستين ..
بنشوفه ونقول عشرين
وشاب عنده يادوب ثلاثين ..
وتمللى مهموم وحزين
وتلقى وشه عجوز كمشان
ماهى دنيا فيها أشكال وألوان
صاحبك وماشى يكلم فيك
وعقله في دنيا غير الدنيا
وغيره افندى ولايس شيك
لكن حقيقته .. حاجة تانية
ومرة يبقى عينيه في عينيك ..
وكأنه لا شافك .. كأنه ما كان

ماهى دنيا فيها أشكال واللوان
ياما الهدوم مدارية ف ناس ..
وأبواب كتير مقفولة على غيرهم
وأصحاب كتير فقدوا الإحساس
يتعاملوا معاك .. خارج مشاعرهم
ماهى دنيا دايرة على كيفها
مين اللى يقدر يوقفها
ولسه ياما .. نشوفوا كمان
ماهى دنيا فيها أشكال واللوان

وحيد وسط الضجيج

الألم والسعادة .. متضفرين في ضفيرة
زحام قدام عينيّ .. سراب .. وفرحة أسيرة
الحزن غراب .. بينق في خراب .. والفرح غاب
احتار العقل بين سؤال وجواب ..
لما الأمل والملل بقوا حزمة واحدة
وشعور يدور عن فرحة نائية .. عن بسملة حزينة
في نظرة شاردة
من عيون بريئة .. ومنتشوقة للحقيقة ..
والحقيقة لما يخرج من وسط الثلج .. وردة ..
تفرح القلوب ، تدفى الشعور بالغربة
واستى يبجى يوم ، ويمدوا أيدين صغيرة ..
وينزعوا م القلب حربة
انغرس في عز الضلمة .. كانت الدنيا زحمة ..

لكنه رغم الزحام .. كان فراغ قدام عينيّ
وساعتها قصوا غصوني .. قصوا البراعم ، بدون رحمة
والغصون كانت نضرة .. كانت خضرة .. نبتت غصون
ونبتت زهور جديدة ..
من نفس نوع الشجرة اللي الزمان ماغيروش ..
واللي لو حاولوا من تاني يخلعوه أو يقلعوه .. ما حيقدروش
ماهي شجرة طيبة .. ما يقلعهاش شر
كما النخيل .. طرحه مبارك .. وتمر
لكن الغراب .. أكيد حيعيش لوحده بدون أحباب
هو اللي بيده .. وهد عشه .. وبقي خراب
لأن الشر زى النار .. بتاكل نفسها .. لما يقوم الحريق
ولأن المظلوم وكان له حق .. والحق ثابت جري
حيجي اليوم .. ينال حقه .. وحبيقي حقيق
ويبقى له حباب .. وعمره ما حيعيش وحيد وسط الضجيج

الصبر جميل

قالوا إن الصبر جميل ..
ويا ما غنوا عليه مؤثرين ..
أتارى إن الصبر أنواع
وأنا صبرى مالوش مثيل
يا ما شفت معاه ألوان ..
من فرح ومن أحزان ..
وحاولت القي له بديل
مالقيت للصبر مثيل
الصبر عندى نوعين :
صبرت على اللي باحبه ..
على مر قساوة قلبه ..
وغمضت عليه العين ..
وصبرت على اللي كرهته ..
قعدت مدة ما شفته ..

وحاولت انسى الاتنين ..
وبعت لهم مراسيل
بنقول الصبر جميل
عجز الصبر عن صبرى ..
ولأنى راضى بقدرى ..
وبانام مرتاح البال
حاول الشيطان يلاعبنى ..
يمكن يقدر يغلبنى ..
يرمىنى فى الأهوال
مالقاش لطريقى سبيل ..
لأن إيماني أصيل ..
وحنبقي على ده الحال
قلبي منور قناديل
مليانة بصبر جميل
ده الصبر حقيقى جميل

الى يعيش .. ياما يشوف

الى يعيش .. ياما يشوف .. والرجال بيشفوا اكثر
نوع م الناس .. مشاكلها ألوف .. وبعض الناس مشاكلها أخطر
فيهم الى همومه على دفوف .. وفيه الى كاتبها ف دفت
وده خلانى رجال وباطوف
الى يعيش .. ياما يشوف

* * *

فيه ناس قلوبها .. اكبر م الدنيا .. يناموا ومرتاحين البال
وغيرهم حياتهم محسوبة بالثانية .. وكل حياتهم بس المال
ومنهم ناس عقولهم خاوية ..
كلامهم جارح وما فيش كسوف
بتتمنى لهم كل خير ..

وينكروا لك المعروف
ده الى يعيش .. ياما يشوف

* * *

غنى النفوس .. كان يكفى الناس
والطماع.. نهايته فلاس
وعمر بيته ما حيلاش
ما هى دنيا خاينة وماتسواش
خلوا قلوبكم غنية إيمان
تلقوا البركة ف كل مكان
واللقة الحاف .. بالبركة خروف
ده اللى يعيش .. ياما بيشوف

ما تخافش.. انا جنبك

قال لي في يوم .. ما تخافش أنا جنبك ..
قلت ياريتك تكون معاي ..
لو كنت قلتها من قلبك .. كنت تبقى على هواي ..
ده الفرق بين جنبك ومعاك ..
زي المسافات بين الأفلاك ..
خليك معاي ده أنا ف عرضك
وبلاش تقول .. أنا جنبك

* * *

يمكن وانت جنبى ما تسمعنيش
أو حتى ممكن ما تشوفنيش
حتفضل جنبى .. ما يلزمنيش
لكن معاي .. في أمان حاعيش
ويحس قلبي بنبض قلبك

خليك معاى ده أنا فى عرضك

وبلاش تقول .. أنا جنبك

* * *

ياريت يا صاحبي تفهم كلامي ..

واشعر بأني حنة منك

وما تكون كما بعض جيرانى ..

قافلين الأبواب .. ما عرفوا حالى ..

ولا حتى سألوا .. إيه اللي عندك ؟

خليك معاى .. ده أنا ف عرضك

وبلاش تقول .. أنا جنبك

كفاية .. نوم

قم يا صاحبي .. قوم ...
قوم .. كفاية نوم
عمر النوم يا صاحبي ..
ما ينسبك الهوم
ليه راح يفيد هروبك ..
مهما طولت نومك ..
النوم عم القوم
والدنيا هي .. هي
أيامها رايحة جاية
وامبارح زى اليوم
قم يا صاحبي قوم
نومك زى موتك
وانت مازلت حى
القطر لو يفوتك ..
مش مضمون اللي جاى
هروبك من همومك ..

مش معناه النجاة
ده التنعام دفن راسه
وجسمه عريان وراه
وانت واخدها نوم .. !
قم يا صاحبي .. قوم
قوم .. وكفاية نوم .
لو طلعت شمسك عليك ..
تكون سايب فراشك
كفاية الليل سكون
ده فى النهار معاشك
إسعى فى أرض الله ..
وارمى وراك الكسل
تتفتح أبواب لِرزقك ..
ده النحل ينتج عسل
ولما الشعاع يزيد
راح تختفى الغيوم
قم يا صاحبي قوم .. قوم وكفاية نوم

إبنى الحبيب

يا حنة منى .. يا ابني الحبيب
يا غالى عندى .. بعيد أو قريب
أنا عشت عمري .. وكل أملى .. تبقى أمير ..
قلبه كبير ..
يداوى قلوب .. محتاجة بلسم
بكلمة حلوة .. تقولها غنوة .. تشجى وتلهم
بصوت حنين .. وكلام رصين .. بحروف بترسم
وتمللى شمسك .. دائماً تتور .. ولا عمرها فى يوم تغيب
يا حنة منى .. يا ابني الحبيب
يا ننى عيني .. ونور عيني .. وأغلى عندى .. م الدنيا دى
لو غبت عنى .. ولو دقائق .. قلبى يدق .. سابق الدقائق
ولما ترجع .. يرتاح فؤادى .. مش إنت إبنى .. وأكبر ولادى ..؟
وإنت زرعى .. اللى راعيته .. بيمينى دى سنين سقيته
واسنتى يوم .. من بعد يوم .. يهل طرحه .. واشوف ولاده
وتبقوا شمس وقمره ونجوم .. رغم الفصول .. كله ف معاده
دايماً ربيع .. ولا عمر شمسك يا ولدى تغيب

يا حنة منى .. يا ابنى الحبيب

* رد الإبن *

مش عارف ابدأ منين كلامى .. ده مافيش كلام يوفى المعانى
ليكى يا أمى تحية وسلام ..

ده كلامى ليكى .. إحساسى بيكى .. فوق الكلام
روحى وكيانى .. اللي بدلوا فيكى .. وبين يديكى عاشوا فسلام
أعلى الأمانى .. باتمنى ليكى .. تعيشى لى .. يا نور عيني
وده يا أمى .. هدية ليكى .. وكمان يا غالية .. شوية عليكى
يا شائلة عمى .. ولا يوم تملى .. تدعى لى دائماً والله مجيب
أعيش سعيد .. ودعاكى يصيب

كنتى تقولى لى .. يا حنة منى .. يا ابنى الحبيب
وأنا باقول لك .. يا ست الحباب .. يا أم الحبيب

باشتاق لك يا أمى

باشتاق لك يا أمى .. لكن انتى فين ؟..

باشتاق لحبك ..

باشتاق لعطفك .. وكلى حنين

باشتاق لضمة إيديكى الاتنين

وما أبقى وحدى ..

برغم عمرى .. رغم السنين

بادور عليكى ..

ومش لاهيكى ..

أحاول ابكى ..

تعصى دموع العين

واشتاق لك يا أمى .. لكن انتى فين ؟..

مين غيرك يا أمى .. يا ليلة قدر

مين كان بيدعى لى .. ف صلاة الفجر

وانام مرتاح .. لما تحكى لى

باحص بأمان .. وانتى تغنى لى
وتبجى جنبى ..
تحطى راسك على قلبى
ما فى حد حس بى
ولا حد يخاف على
مين غيرك .. يا أمى مين ؟..
واشتاق لك يا أمى .. لكن انتى فين ؟..
فانت السنين .. وكبرنا ..
فرقتنا الدنيا .. وسافرنا ..
وبعدنا كثير .. كثير .. بعدنا
قسيت علينا الدنيا .. وقسيوا ولادنا
وزاد همونا .. غربة قلوبنا
عرفنا فضلك .. ووحشنا عطفك
ما لقينا .. مين يصبرنا .. ما لقينا مين ؟..
واشتاق لك يا أمى .. لكن انتى فين ؟..

من الشاعر المغربي .. مصطفى العاشق
إلى شاعر الغربة .. عبد الحميد فرج
(عمره كتابو)

لوحة حدا لوحة .. وعمر كتابه
على راسو .. ناسو .. ولحيابه
لوحة تكون باللون، ولوحة يعمرها بدهون ،
وأخرى بقلبه المطعون ..
ويولدها لوحة
كانت لوحته الأولى .. بلاده
والثانية اللي نواها .. سناده
والثالثة كانت على .. ولاده
وبدأت الحكاية
م اللي البلدان حضنت مهالها .. هو غرياته
م اللي الخلالت حضنات أحبابها .. هو رماته

م اللي الولاد طاعت بواتها .. هو عصاته
فكر ايش يدبر ..؟
خدا فدان ورقة .. وهواها
وبدا يغرس جدور .. بعصاته
فى مرة يحلم بالورد
وفى مرة بابه .. على راسه .. يسد
حتى جا .. نهار .. اللي خرج فيه من عصارة عشوبه
وبدا لراسه طريق اخرى
رجع لنا .. قرب منا .. احضنا كلنا
عرف ايشكون الراغب .. ومرغوبه ..
اليوم فاق خويا .. جالي
حسيت باللى فيه .. وداوى ما بي
حيث تأكد باللى البحر اللي أمواجه ما تدور
حوته .. يخرج للشط .. ويموت مجبور

صدر من مطبوعات الفجر

١ - تغريبة عبر زاق الهالكي	دراما شعرية	د. يسرى العزب
٢ - الهاموش	قصص	حسن نور
٣ - المبعدون	قصص	إدريس على
٤ - حكايات مصرية	قصص	د. نجدى إبراهيم
٥ - الدائرة	رواية	د. نجدى إبراهيم
٦ - شجرة مريم	شعر	د. يسرى العزب
٧ - تأملات في الفن والثقافة	نقد	د. محمد حسن عبد الله
٨ - أمسيات عائلية هادئة	قصص	منتصر ثابت
٩ - شجر الليمون	شعر	خالد النشوقاتى
١٠ - عصفور الحب	شعر	نجاة خليل
١١ - حتى لا يطول الانتظار	قصص	محمد نور الدين
١٢ - اكتب عمري	شعر	ليلى محمد على
١٣ - زائر بعد منتصف الليل	رواية	مديحة أبو زيد
١٤ - خاطئة في الجنة	رواية	يحيى سليمان
١٥ - النملة والحداية	شعر للأطفال	عزت زايد
١٦ - واحد انتين	شعر للأطفال	عزت زايد
١٧ - المرأغز	رواية	سيد أمين
١٨ - فيكى إيه يتحب !؟	شعر	جلال الصياد
١٩ - فرس جامح	شعر	ليلى محمد على
٢٠ - حريم الملح والسكر	مسرحية	محمد الغيطي
٢١ - قمر المغارب	شعر	د. يسرى العزب
٢٢ - الدنيا جاية	شعر	د. فاطمة الحفني
٢٣ - آه يا وطن	شعر	م. منى عوض
٢٤ - تخاريف	شعر	نبيل أبو السعود
٢٥ - ليلة دافئة	قصص	فرج محمود
٢٦ - ضاع الطريق مننا	شعر	عبد الحميد فرج

رقم الإيداع بدار الكتب المصرية

٢٠٠٤ / ٩٧٧٤

هيئة حفظ حقوق المؤلفين

جميع الحقوق محفوظة للمؤلف

مسجل في SABAM – بروكسل

تحت رقم 6455 بتاريخ 25-2004